

Tabell C-k

Saker med særskild fordeling for kommunane 2021

Følgjande saker er gitt ei særskild fordeling innanfor innbyggjartilskotet i 2021:

Kol.	Sak	Beløp i 1000 kr
1	Inndelingstilskot	1 408 519
2	Trekk Nannestad og Ullensaker	-19 350
3	Helsestasjons- og skulehelseteneste	928 990
4	Korreksjon kommunal medfinansiering statleg barnevern	-30 580
5	Forsøk med ny oppgave- og ansvarsdeling i barnevernet	58 977
6	Uttrekk forsøk statleg finansiering omsorgstenestene	-1 935 042
7	Overføring av ansvar for AC Møller skule	4 064
8	Kompensasjon for endringar i regelverket for eigedomsskatt	174 400
9	Innlemming av tilskot til auka lærartettleik	676 201
10	Habilitering og avlastning	100 000
11	<i>Sum</i>	<i>1 366 179</i>

For fleire av sakene er beløpet frå 2020 prisjustert med anslått pris- og lønnsvekst frå 2020 til 2021 (kommunal deflator). Den kommunale deflatoren for 2021 er anslått til 2,7 pst.

Kolonne 1 – Inndelingstilskot

Inndelingstilskotet er ei kompensasjonsordning for kommunar som slår seg saman og skal kompensere kommunane for ein reduksjon i rammetilskotet som følgje av samanslutninga. Inndelingstilskotet kompenserer for bortfall av basistilskot og ein eventuell nedgang i distriktstilskot. To kommunar som har slått seg saman vil få eit basistilskot på same måte som andre kommunar i utgiftsutjamninga, mot to basistilskot før samanslåinga. Den samanslåtte kommunen blir difor kompensert gjennom inndelingstilskotet for bortfall av eit basistilskot. Dersom ein samanslått kommune får mindre i distriktstilskot enn kommunane ville fått kvar for seg, blir kommunen gjennom inndelingstilskotet kompensert for differansen mellom det den samanslåtte kommunen får og det dei ville fått kvar for seg.

Inndelingstilskotet blir gjeve frå det året samanslåinga trer i kraft. Kommunane får fullt tilskot i 15 år, før det deretter blir trappa gradvis ned over fem år. For kommunar som slo seg saman i perioden 2014–2017 (kommunereforma) blir inndelingstilskotet rekna ut frå gjeldande inntektssystem i 2016.

I 2021 får 53 kommunar inndelingstilskot. 43 nye samanslåingar får inndelingstilskot ut frå inntektssystemet i 2016. For kommunar som blir delte er inndelingstilskotet fordelt til dei kommunane dei blir slått saman med ut frå prosentdelen innbyggjarar som blir overført (innbyggjartal per 1. januar 2019).

Som følgje av nedtrappinga av inndelingstilskotet, er tilskotet til Bodø kommune redusert til 60 pst. av fullt tilskot, mens tilskotet til Aure og Vindafjord er redusert til 80 pst. av fullt tilskot. Inndelingstilskotet til Re kommune (nye Tønsberg) er avvikla i 2021.

Beløpa er prisjustert med kommunal deflator.

Kolonne 2 – Trekk Nannestad og Ullensaker

Nannestad og Ullensaker fekk i perioden 1993–2008 finansieringsbistand i form av skjønsmidlar i samband med etableringa av Oslo Lufthamn, Gardermoen. Totalt har kommunane motteke 735,5 mill. kroner, der 387 mill. kroner skal betalast tilbake i 20 like store avdrag frå og med 2009. Dette blir gjort ved eit trekk i rammetilskotet til Nannestad og Ullensaker på høvesvis 7,43 og 11,92 mill. kroner årleg t.o.m. 2028. Trekket blir ikkje prisjustert.

Kolonne 3 – Helsestasjons- og skulehelseteneste

Regjeringa har styrkja helsestasjons- og skulehelsetenesta, inkludert jordmortenesta. Sidan 2014 er det løyvd midlar til helsestasjons- og skulehelsetenesta via rammetilskotet. For 2021 er det samla beløpet til fordeling prisjustert med kommunal deflator, og utgjer til saman 929,0 mill. kroner. Midlane er føreslått fordelt til kommunane basert på talet på innbyggjarar i alderen 0–19 år, med eit minstenivå på 100 000 kroner per kommune.

Kolonne 4 – Korreksjon barnevern, uttrekk Oslo kommune

I 2015 vart det lagt inn 160 mill. kroner i rammetilskotet som følgje av auka kommunal medfinansiering av det statlege barnevernet. Denne endringa gjaldt ikkje Oslo kommune, som òg har ansvaret for den statlege delen av barnevernet i Oslo.

Sidan det ikkje er mogleg å halde Oslo utanfor fordelinga av midlane, fekk Oslo om lag 26 mill. kroner gjennom kostnadsnøkkelen til dette føremålet i 2015. For at Oslo skal gå i null vart det lagt inn ein korreksjon på -26,012 mill. kroner i tabell C i 2015. Trekket for 2021 er prisjustert med kommunal deflator.

Kolonne 5 – Forsøk med ny oppgåve- og ansvarsdeling i barnevernet

Barne- og likestillingsdepartementet sette i 2016 verk eit forsøk med auka kommunalt ansvar for barnevern i (noverande) Færder, Alta og Røyken. Rammetilskotet vart auka for å kompensere dei tre kommunane for auka utgifter til barnevernet. Forsøket i Røyken vart avvikla som planlagt ved utgangen av 2019, mens Alta og Færder har fått innvilga søknad om å vidareføre forsøket til barnevernsreforma trer i kraft. Beløpet frå 2020 er prisjustert med kommunal deflator.

Kolonne 6 – Forsøk med statleg finansiering av omsorgstenestene

Forsøk med statleg finansiering av omsorgstenestene vart sett i verk 1. mai 2016 og blir administrert av Helse- og omsorgsdepartementet. Forsøket blir i hovudsak finansiert ved at midlar blir trekt ut av innbyggjartilskot til forsøkskommunane og overført til kap. 761, post 65 på Helse- og omsorgsdepartementet sitt budsjett. Indre Østfold kommune deltar i forsøket frå 1. januar 2021. Sjå Prop. 1 S (2020–2021) for Helse- og omsorgsdepartementet for nærare omtale av forsøket.

Kolonne 7 – Overføring av A. C. Møller skule frå Statped til Trondheim kommune

Ansvaret for drifta av A. C. Møller skule vart overført frå Statped til Trondheim kommune frå 1. juli 2017. Kommunen blir kompensert for dette med ein auke i rammetilskotet, gitt med særskilt fordeling til og med 2021. Frå og med 2022 vil midlane bli fordelte etter dei ordinære kriteria i inntektssystemet. Beløpet frå 2021 er prisjustert med kommunal deflator.

Kolonne 8 – Kompensasjon for endringar i regelverket for eigedomsskatt

I statsbudsjettet for 2019 vart det sett av 71 mill. kroner til å kompensere kommunar som får reduserte inntekter som følgje av at dei ikkje lenger kan krevje inn eigedomsskatt på produksjonsutstyr og -installasjonar. I 2019 var kompensasjonen ein del av skjønstilskotet. I 2020 vart kompensasjonen auka til 143 mill. kroner, og flytta over til innbyggjartilskotet (tabell C). I 2021 er kompensasjonen auka til 174,4 mill. kroner.

Kompensasjonen blir berekna på grunnlag av kommunane si rapportering av skattegrunnlaget for dei aktuelle eigedomane for 2018 og 2019, kopla med skattesatsen som kommunane har rapportert inn til KOSTRA. Kommunane er kompenserte fullt ut utover ein gitt eigendel per innbyggjar av det berekna inntektsbortfallet i 2021. Eigendelen i 2021 er om lag 126 kroner per innbyggjar.

Kolonne 9 – Innlemming av tilskot til auka lærartettleik

Tilskotet til auka lærartettleik på 1.–10. trinn vart innlemma i rammetilskotet i 2020. Det vart overført 1 316,8 mill. kroner til rammetilskotet, og midlane vart gjeve ei særskild fordeling (tabell C).

Frå 2021 blir det gjort ei justering i delkostnadsnøkkelen for grunnskulen for å ta omsyn til innføringa av normen for lærartettleik, jf. Prop. 105 S (2019–2020) *Kommuneproposisjonen 2021*. I 2021 blir 50 pst. av det innlemma tilskotet fordelt etter dei ordinære kriteria i inntektssystemet, medan 50 pst. av midlane framleis blir gjeve ei særskilt fordeling. Midlane som blir fordelt særskilt i 2021 er delvis fordelt etter behov for lærarårsverk, og delvis etter delkostnadsnøkkelen for grunnskulen.

Frå og med 2022 vil midlane bli fordelt etter dei ordinære kriteria i inntektssystemet.

Kolonne 10 – Habilitering og avlastning

Smitteverntiltaka i samband med utbrotet av covid-19 har gjeve auka belastning for pårørande av barn og unge med nedsett funksjonsevne. Regjeringa føreslår å auke rammetilskotet med 100 mill. kroner som ei eingongsløyving på bakgrunn av behovet for å gje eit godt habiliterings- og avlastningstilbod til barn og unge med nedsette funksjonsevne. Midlane er fordelt etter delkostnadsnøkkelen for kommunehelse. Sjå Prop. 1 S (2020–2021) for Helse- og omsorgsdepartementet for nærare omtale.

Kolonne 11 – Sum saker med særskild fordeling

Summen av kolonnane 1–10. Talet er nytta i tabell 2-k, kolonne 3. Midlane er lagt inn i innbyggjartilskotet og er i hovudsak haldne utanfor utrekninga av inntektsgarantiordninga.